



Sumáriu Kazu
Tribunál Distritál Baukau
Períodu Marsu 2019

Afirmasaun: Sumáriu Kazu ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza : 32

Artigu	Tipu Kazu	Númeru
Artigu 145 Kódigu Penál (KP), konjuga ho artigu 2, 3, 35(b) no 36 LKVD	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	23
Artigu 154 (KP)	Maus tratus ba kónjuje	4
Artigu 20 Lei Arma Brankas Nú. 5/2017	Arma brankas	2
Artigu 146 (KP)	Ofensa ba integridade fízika grave	1
Artigu 140 (KP)	Omisídiu negli jente	1
Artigu 263 (KP)	Inséndiu	1
Totál		32

2. Totál desizaun ne'ebé JSMP monitoriza : 23

Tipu Pena	Númeru
Suspensaun ba prizaun nia ezekusaun (artigu 68 KP)	16
Suspensaun ba prizaun nia ezekusaun (artigu 68 KP) ho regra ba konduta (artigu 70)	1
Suspensaun ba prizaun nia ezekusaun (artigu 68 KP) ho indemnizasaun sivíl	1
Pena multa (artigu 67 KP)	3
Pena admoestasaun	1
Absolve	1
Totál	23

3. Totál kazu sira ne'ebé sei kontinua tuir JSMP nia monitorizasaun : 9

B. Deskrisaun sumáriu ba desizaun kazu sira ne'ebé JSMP monitoriza:

1. Krime ofensa ba integridade fízika simples ho natureza violénsia doméstika

Nú. Prosesu : 0003/18. BCBCV
 Kompozisaun Tribunál : Singulár
 Juis : Dr. Afonso Carmona
 Prokuradór : Dra. Remizia de Fatima da Silva
 Defeza : Dr. Sidonio M. Sarmiento
 Tipu pena : Pena admoestasaun

Iha 05 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida LS hasoru nia la'en, iha Distritu Manatuto.

Akuzasaun Prokuradór

Prokuradór akuza katak iha 13 Outubru 2018, tuku 10:00 dadeer, arguida deskonfia lezadu iha feen seluk, nune'e, sira diskute malu no arguida tebe dala ida iha lezadu nia hirus-matan no tuku dala ida iha lezadu niaibun rezulta kanek no ran. Hafoin lezadu ba hala'o tratamentu iha Sentru Saúde Manatuto.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguida konfesa faktu hotu iha akuzasaun no deklara katak iha momentu ne'ebá arguida koalia ba lezadu katak *"ita moris hamutuk hanesan feen ho la'en ona, keta ó iha feto seluk karik?"* Bainhira rona arguida koalia hanesan ne'e, lezadu hatan ba arguida katak *"ó ba buka fali mane seluk ba"*, nune'e arguida halo agresaun refere hasoru lezadu. Arguida deklara

katak arrepende ona nia hahalok maske sira hela separadu ona no foin primeiravés mai hatan iha tribunál.

Entretantu, lezadu kontinua konfirma faktu sira iha akuzasaun no hatutan katak arguida husu lezadu iha feen seluk karik. Tanba ne'e lezadu hatan ba arguida katak “*laiha, ha'u nian feen mak ó deit*”. Depoide lezadu hatan nune'e, arguida tebe kedas dala tolu tuir-tuir malu iha lezadu nia hirus-matan no tuku dala ida iha lezadu nia ibun rezulta kanek no ran sai. Aleinde ne'e, lezadu konfirma ho arguida nia deklarasaun katak agora sira hela separadu ona maibé tanba arguida mak lakohi moris hamutuk ona ho lezadu.

Alegasaun final

Prokuradór konsidera arguida provadu komete krime hasoru lezadu bazeia ba konfisaun arguida nian no deklarasaun hosi lezadu iha audensia julgamentu. Prokuradór hato'o katak nia foin primeiravés akuza fetu ba krime violénsia doméstika tanba dala barak mane mak halo agresaun hasoru fetu. Tanba arguida no lezadu deside moris fahe malu ona, nune'e husu ba tribunál atu aplika pena admoestasaun ba arguida.

Enkuantu, defeza husu ba tribunál atu kondena arguida ho pena ne'ebé adekuada tanba arguidu konfesa faktu hotu. Arguidu no lezada hela separadu ona tanba arguida hein lezadu atu ba buka fila fali arguidu atu moris hamutuk nu'udar feen-la'en maibé lezadu la ba arguida nia uma. Arguida arrepende ninia hahalok no foin primeiravés mai hatan iha tribunál.

Desizaun

Depoide avalia faktu hotu, tribunál prova katak arguida komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguida konfesa, arrepende ona ninia hahalok no foin primeiravés mai hatan iha tribunál, nune'e tribunál kondena arguidu ho pena admoestasaun.

2. Krime inséndiu

Nú. Prosesu	: 0039/18. BCSIC
Kompozisaun Tribunál	: Koletivu
Juis	: Dr. Jose Quintão, Dr. Antonio Fonseca no Dr. Hugo da Cruz Pui
Prokuradór	: Dr. Gustavo A. M. da Silva
Defeza	: Dr. Antonio Fernandes
Tipu pena	: Absolve

Iha 05 Marsu 2019, Tribunál Distritál Baukau prezide julgamentu leitura akordaun ba krime inséndiu ne'ebé envolve arguidu Domingos da Costa Ribeiro hasoru Nicolau Borges da Silva, iha Suku Triloka, Distritu Baukau.

Akuzasaun Prokuradór

Prokuradór akuza katak iha 22 Juñu 2018, tuku 13:20 meudia, lezadu ho nia feen hamoos hela sira nia kintal iha sira-nia uma sorin. Iha tempu hanesan arguidu rasik hamoos nia kintal no sunu foer sira to'o ahi lakan boot rezulta ahi han lezadu nia uma adat. Lezadu konsege hasai deit surik lulik ida no diman lulik ida. Entretantu sasan lulik no sasan sira seluk la konsege salva. Lezadu hetan prejuízu ho valor la liu hosi US\$5,000.00.

Prokuradór akuza arguidu kontra artigu 263 KP kona-ba krime inséndiu ho moldura penál hosi tinan 2 to'o tinan 8 prizaun.

Produsaun ba prova sira

Durante julgamentu, arguidu deklara katak arguidu rekoñese katak nia hamoos duni nia to'os hamutuk kabubu haat no sunu foer sira. Maibé derrepente lezadu hakilar katak ahi han sira nia uma-adat. Arguidu hakfodak no hamutuk ho família sira seluk ajuda hasai lezadu nia sasan sira hosi uma-adat ne'e hanesan bikan, kanuru, biti, kopu, balde no ai-kabel. Arguidu mós haree lezadu hasai surik ida, diman ida no kohe ida. Arguidu deklara katak arguidu nia to'os ho lezadu nia uma-adat estrada haketak tiha ho distansia maizumenus metru 70. Arguidu sunu nia to'os iha parte tasi mane maibé ahi han uma-adat parte tasi feto no iha momentu ne'ebá la iha anin-boot.

Entretantu, lezadu deklara katak iha momentu ne'ebá lezadu ho nia feen iha hela sira nia to'os no rona ema hakilar ahi han uma-adat. Hafoin ida-ne'e lezadu halai tama ba uma-adat no foti sai surik lulik ida no diman lulik ida. Lezadu deklara katak arguidu ho família sira seluk ajuda hasai sasan balun enkuantu sasan sira seluk ahi han hotu. Lezadu akresenta katak gastu hodi halo uma-adat ne'e maizumenus US\$4,600.00. Maske lezadu la haree ho matan ema ne'ebé sunu maibé lezadu deskonfia arguidu mak sunu tanba antes akontesimentu, arguidu sunu hela foer iha nian to'os ho distansia maizumenus metru 50.

Testemuña Izilda Liborio Sarmiento nu'udar viziñu depoimenta katak bainhira nia fila ba uma depoisde fase ropa besik iha arguidu nian to'os, rona ema hakilar no haree ahi han ona uma. Testemuña la hatene no la haree ho matan se mak sunu maibé testemuña hamutuk ho família sira seluk ajuda malu hasai lezadu nia sasan.

Testemuña Adriano da Silva nu'udar viziñu depoimenta katak testemuña halai duni ba iha fatin akontesimentu no haree ahi han hotu ona uma ne'e. Testemuña la hatene se mak sunu lezadu nia uma-adat ne'e.

Alegasaun final

Prokuradór mantein faktu sira iha akuzasaun no bazeia ba produsaun ba prova sira konsidera katak arguidu provadu komete krime ne'ebé dun ba nia tanba iha momentu ne'ebá arguidu sunu du'ut iha nia to'os kauza ahi han lezadu nia uma-adat. Prokuradór konsidera akontesimentu ne'e

mai hosi arguidu nia konduta. Tanba ne'e, husu ba tribunál atu kondena arguidu tuir konviksaun tribunál nian.

Enkuantu defeza haktuir katak arguidu konfirma nia sunu duni du'ut iha nia to'os no laiha anin maibé derrepente lezadu hakilar ahi han-uma adat. Depoisde ne'e arguidu sente preukupa no hatudu nia solidariedade ba lezadu através hosi ajuda salva lezadu nia sasan balun. Aleinde ne'e, laiha ema ruma deklara katak tanba arguidu nia konduta mak lezadu nia uma-adat ahi han. Tanba ne'e, arguidu ninia hahalok ne'e la priense rekezitu hosi krime ne'ebé duun ba arguidu. Bazeia ba konsiderasaun ne'e, husu ba tribunál decide tuir konviksaun tribunál nian.

Desizaun

Depoisde avalia faktu sira hotu, tribunál konsidera katak arguidu la provadu komete krime hasoru lezadu tuir akuzasaun prokuradór nian no faktu sira ne'ebé prodús. Bazeia ba konsiderasaun hirak ne'e no faktu sira, tribunál konklui prosesu ne'e no absolve arguidu hosi prosesu ne'e.

3. Krime ofensa ba integridade fízika simples ho natureza violénsia doméstika

Nú. Prosesu	: 0006/18. LALRO
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Luis H. Rangel da Cruz
Defeza	: Dr. Jose M. Guterres
Tipu pena	: Pena multa US\$30.00

Iha 07 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CdC hasoru nia feen, iha Distritu Lautem.

Akuzasaun Prokuradór

Prokuradór akuza katak iha 22 Setembru 2018, tuku 12:00 meudia, arguidu tebe dala rua iha lezada nian kanotak-karuk no rezulta metan, bubu no moras. Aleinde ne'e, arguidu mós tolok lezada. Hafoin lezada ba keixa iha polísia no kontinua ba tratamentu iha Sentru Saúde Lautem. Kazu ne'e akontese bainhira lezada husu osan ba arguidu atu selu tusan.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu, arguidu deklara katak lezada husu osan atu selu tusan no arguidu fó tiha ona osan ba lezada maibé lezada husu tan dala ida, nune'e arguidu halo agresaun hasoru lezada.

Arguidu mós deklara katak diak malu fali ona ho lezada no to'õ agora la baku ona lezada. Arguidu foin primeiravés mai hatan iha tribunál no perante tribunál arguidu promete sei la halo tan krime hanesan hasoru lezada ka membru família sira seluk iha futuro. Entretantu, lezada kontinua konfirma faktu sira iha akuzasaun no rejeita ho arguidu nia deklarasaun ne'ebé hateten katak sira diak malu tanba tuir lezada sira seidak diak malu no agora dadaun separadu ona nu'udar feen-laen. Lezada hatutan katak nia sei hadomi arguidu maibé arguidu rasik la buka lezada atu diak malu. Aleinde ne'e, arguidu nia família mós lakohi simu lezada sai arguidu nia feen.

Alegasaun finál

Prokuradór haktuir katak arguidu provadu komete krime hasoru lezada tanba arguidu konfesa faktu hotu iha akuzasaun no lezada kontinua konfirma faktu sira iha akuzasaun. Tanba ne'e, husu ba tribunál atu aplika pena prizaun fulan haat suspende ba tinan ida.

Entretantu, defeza husu ba tribunál atu aplika pena ne'ebé adekaudu ba arguidu tanba konsidera arguidu konfesa faktu hotu iha akuzasaun, arrende ona ninia hahalok no foin primeiravés mai hatan iha tribunál.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena multa US\$30.00 ne'ebé sei selu 0.50 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

4. Krime ofensa ba integridade fízika simples ho natureza violénsia doméstika

Nú. Prosesu	: 0105/18. BCBCV
Kompozisaun Tribunál	: Singulár
Juis	: Dra. Ersilia de Jesus
Prokuradór	: Dr. Remizia de Fatima da Silva
Defeza	: Dr. Antonio Fernandes
Tipu pena	: Pena prizaun fulan 7 suspende ba tinan 1 fulan 6

Iha 08 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu EP hasoru nia feen, iha Distritu Baukau.

Akuzasaun Prokuradór

Prokuradór akuza katak iha 16 Jullu 2018, tuku 12:00 meudia, arguidu no lezada diskute malu kona-ba lezada haruka arguidu ba hili ai-maran. Hafoin arguidu tuku dala rua iha lezada nia matan-fukun no rezulta bubu no metan, nomos tebe dala haat iha lezada nia kotuk-laran no tuku

dala rua iha kabaas loos. Depoisde akontesementu ne'e lezada ba informa iha xefe aldeia no kontinua ba hato'o keixa iha polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35 (b) no 36 LKVD.

Produsaun ba prova sira

Durante julgamentu arguidu konfesa ninia hahalok no deklara katak momentu ne'ebá arguidu kole hela tanba foin fila hosi halo uma-adat. Maibé lezada obriga arguidu tenke ba hili ai-maran no lezada koalia be-beik, nune'e, arguidu halo agresaun hasoru lezada. Arguidu mós deklara katak arrepende ona ninia hahalok no depoisde akontesimentu sira diak malu to'o agora no moris hamutuk nu'udar feen-la'en. Arguidu foin primeiravés mai hatan iha tribunál no iha oan na'in walu.

Entretantu, lezada kontinua konfirma faktu sira iha akuzasaun no deklara katak to'o agora arguidu la baku ona lezada no kontinua moris nu'udar feen-la'en. Lezada mós deklara katak nia saude rekopera depoisde semana ida.

Alegasaun finál

Prokuradór konsidera arguidu provadu komete krime hasoru lezada no argumenta katak lezada mós iha responsabilidade atu fó hanoin ba arguidu hodi buka ai-maran ba fa'an tanba durante ne'e sira nia moris hosi rezultadu fa'an ai-maran. Tuir loloos arguidu uza meu seluk atu rezolve problema simples ne'e la'os uza forsa fíziku hasoru lezada. Arguidu nia konduta ne'e priense elementu krime ne'ebé akuza ba nia. Bazeia ba konsiderasaun ne'e, husu ba tribunál atu kondena arguidu ho pena prizaun tinan ida suspende ba tinan rua.

Enkuantu defeza husu ba tribunál atu kondena arguidu ho pena ne'ebé justu ho konsiderasaun sira katak arguidu konfesa faktu, arrepende ona nia hahalok no foin primeiravés hatan iha tribunál. Arguidu mós diak malu ona ho lezada no arguidu mak sustenta família liuhosi fa'an ai-maran.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa faktu sira, arrepende ona ninia hahalok, diak malu ona ho lezada no foin primeiravés mai hatan iha tribunál, nune'e tribunál kondena arguidu ho pena prizaun fulan hitu suspende ba tinan ida fulan neen.

5. Krime omisídiu negligente

Nú. Prosesu : 0016/18.MNSTR

Kompozisaun Tribunál : Singulár
Juis : Dra. Ersilia de Jesus
Prokuradór : Dra. Remizia de Fatima da Silva
Defeza : Dr. Sidonio M. Sarmiento
Tipu pena : Pena prizaun tinan 1 suspende ba tinan 2 ho indemnizasaun
sivíl US\$3,000.00

Iha 08 Marsu 2019, Tribunál Distritál Baukau prezide julgamentu leitura sentensa ba krime omisídiu negligente ne'ebé envolve arguidu Teofilio Pinto hasoru lezadu Lourenco Soares, iha Distritu Manatuto.

Akuzasaun Prokuradór

Prokuradór akuza katak iha 18 Maiu 2018, tuku 10:00 dadeer, arguidu konduz kareta kamioneta kinur ida ho númeru matrikula 51-458 TIs hosi diresaun Dili-Uatulari ho velocidade normal. Iha kamioneta laran arguidu tula arguidu nian feen ho nian oan ida. Bainhira to'o iha Manatuto área masin nian, lezadu korta estrada. Arguidu apita no hakilar maibé kamioneta kose duni lezadu rezulta monu no nakdedar iha estrada klaran. Arguidu tun hosi kareta no haksoit liu tiha lezadu dala hitu atu arguidu la bele mate maibé lezadu mate duni.

Bainhira haree katak lezadu mate ona, arguidu ho nian feen no oan sa'e bis diresaun Baukau-Dili atu entrega-an iha polísia Manatuto nian maibé iha dalan-klaran hasoru polísia ona nune'e arguidu entrega-an ba iha polísia refere no lori ba iha edifisiu polísia Manatuto. Arguidu halo ona akordu ho família lezadu nian kona-ba akontesimentu ne'e, katak sei fo primeiru arguidu fó osan US\$2,000.00 no fahi ida ba iha lezadu nian família. Tuir mai bainhira serimonia funeral, ai-funan fulan neen nian, arguidu sei entrega tan osan US\$1,500.00 no karau ida. Entretantu serimonia koremetan, arguidu sei entrega tan osan US\$1,500.00 no fahi ida.

Prokuradór akuza arguidu kontra artigu 140 KP kona-ba omisídiu negligente ho moldura penál to'o tinan 4 ka multa.

Produsaun ba prova sira

Durante julgamentu, arguidu konfesa integralmente ba faktu hotu iha akuzasaun no deklarata katak arguidu kondus kareta ne'e ho velocidade kilometrazen 70 no bainhira kareta nia ulun atu ultrapasa derrepente lezadu korta estrada no halo arguidu hakfodak. Bainhira arguidu hakfodak, arguidu sees ba lezadu to'o kareta monu tama tiha ba valeta kuak no arguidu haree lezadu monu ona iha estrada klaran. Kona-ba akordu entre arguidu ho família lezadu nian, arguidu deklarata katak nia entrega ona osan US\$2,000.00 no fahi ida. Arguidu sei entrega tan deit karau ida iha serimonia koremetan nian no sei la fó kompletu tuir akordu tanba iha akordu sita katak bainhira arguidu kumpri akordu, sei la prosesa kazu ne'e to'o iha tribunál maibé realidade kazu ne'e to'o

iha tribunál. Aleinde ne'e, arguidu nia kamioneta ne'ebé mak atu buka osan ne'e sei iha hela polísia eskuadra Manatuto.

Testemuña Julia Soares nu'udar lezadu nian feen depoimenta katak testemuña iha hela uma no lezadu ba hein karau. Maibé derrepente nia rona lezadu kareta soke mate. Banhira testemuña ho família sira to'o iha fatin akontesimentu, haree lezadu mate tiha ona ho kondisaun ulun nakfera no kidan tohar. Entretantu, testemuña Filomena da Silva nu'udar arguidu nia feen hili direitu nonook.

Alegasaun final

Prokurador haktuir katak arguidu konfesa faktu hotu iha akuzasaun no konsidera arguidu konduz kareta ultrapasa hosi velocidade normal. Aleinde ne'e, laiha buat ida mak difikulta arguidu tanba iha momento ne'ebá klima diak no kondisaun dalan mós diak. Tanba ne'e, husu ba tribunál atu kondena arguidu ho pena suspensa no fiksa indemnizasaun sivíl tuir arguidu nia kapasidade ekonómia.

Aleinde ne'e, defeza husu ba tribunál atu aplika pena ne'ebé mak kmaan liu ba arguidu, devolve fali fali arguidu nia kareta no kona-ba indemnizasaun sivíl, husu tribunál mak deside. Defeza konsidera katak arguidu konfesa faktu hotu iha akuzasaun, arrepende ona nia hahalok, asidente ita hotu la espera, arguidu lori kareta kleur ona maibé foin mak hetan asidente inklui arguidu foin primeiravés mai hatan iha tribunál.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa faktu sira ne'ebé akuza ba nia, arrepende ona ninia hahalok, diak malu ona ho família lezadu nian no foin primeiravés mai hatan iha tribunál. Tribunál konklui prosesu ne'e no kondena arguidu ho pena prizaun tinan ida suspende ba tinan ida, selu indemnizasaun sivíl US\$3,000.00 (restu hosi total ne'ebé arguidu seidak selu ba família lezadu) ba lezadu inklui selu kustu judisiál US\$20.00. Tribunál mós deside fó fila arguidu nia kareta.

6. Krime ofensa ba integridade física simples ho natureza violénsia doméstika

Nú. Prosesu	: 0008/18.VQWTL
Kompozisaun Tribunál	: Singulár
Juis	: Dra. Ersilia de Jesus
Prokurador	: Dra. Remizia de Fatima da Silva
Defeza	: Dr. Grigório de Lima
Tipu pena	: Pena prizaun tinan 1 suspende ba tinan 2 fulan 6

Iha 8 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CdC hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 16 Marsu 2018, tuku 18:00 lokraik, lezada iha Afaloikai no arguidu telefone ba lezada atu lezada ba iha Vikeke-Vila, maibé lezada lakohi ba. Arguidu kontinua telefone no iha tuku 01:00 madrugada, arguidu ba hasoru tan lezada iha lezada nia avo nia uma ne'ebé lezada toba ba. Bainhira arguidu to'o, arguidu tuku kedas dala haat iha lezada nian ulun no tuku dala ida iha lezada nian matan-fukun. Hafoin ne'e, arguidu la'o tiha ba dapur laran no lezada uza oportunidade ne'e hodi halai tiha hosi fatin akontesimentu.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu no deklara katak arrepende ninia hahalok. Arguidu mós deklara katak foin primeiravés hatan iha tribunál. Kona-ba relasaun ho lezada, arguidu deklara katak to'o agora seidauk diak malu ho lezada. Aleinde ne'e, lezada kontinua konfirma faktu sira iha akuzasaun no deklara mós katak to'o agora sira la moris hamutuk ona nu'udar feen-laen tanba lezada tauk arguidu nia hahalok ne'e.

Alegasaun finál

Prokuradór husu ba tribunál atu kondena arguidu ho pena prizaun fulan sia suspende ba tinan ida fulan neen tanba arguidu konfesa faktu sira hotu iha akuzasaun. Aleinde ne'e lezada mós reforsa faktu sira iha akuzasaun. Ne'e signifika katak arguidu provadu komete krime hasoru lezada.

Entretantu, defeza husu tribunál atu fó pena ne'ebé adekuaudu ba arguidu tanba arguidu konfesa, arrepende ninia hahalok no foin primeiravés mai hatan iha tribunál. Aleinde ne'e, arguidu tenta atu moris hamutuk nafatin ho lezada maibé lezada mak lakohi atu moris hamutuk ho arguidu.

Desizaun

Depoide avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa faktu sira, arrepende ona ninia hahalok no foin primeiravés mai hatan iha tribunál, tribunál kondena arguidu ho pena prizaun tinan ida suspende ba tinan tinan rua fulan neen no selu kustu judisiál US\$20.00.

7. Krime ofensa ba integridade fízika simples ho natureza violénsia doméstika

Nú. Prosesu : 0165/18.BCBCV
Kompozisaun Tribunál : Singulár
Juis : Dr. Hugo da Cruz Pui
Prokuradór : Dra. Remizia de Fatima da Silva
Defeza : Dr. Antonio Fernandes
Tipu pena : Pena prizaun fulan 6 suspende ba tinan 1

Iha 12 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LdC hasoru nia feen, iha Distritu Baukau.

Akuzasaun Prokuradór

Prokuradór akuza katak iha 03 Dezembru 2018, tuku 10:00 dadeer, laiha justifikasaun, arguidu kaer lezada no riba lezada ba rai. Aktu ne'e rezulta lezada nia reen-toos kona fatuk no kanek. Arguidu mós foti fatuk tuku dala ida iha lezada nia ulun, foti besi kanu baku iha lezada nia kidan maibé la kona tanba lezada hases tiha nia-an. Hafoin akontesementu lezada ba halo tratamentu iha PRADET Baukau.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu deklara katak sira nia oan tanis tanba buka ema nia sasan halimar nian no lezada hirus arguidu tanba hanoin arguidu mak baku sira ninia oan, nune'e arguidu halo agresaun refere hasoru lezada. Maibé agora dadaun diak malu ona no to'o agora la baku ona lezada. Arguidu mós foin primeiravés mai hatan iha tribunál no perante tribunál arguidu promete sei la halo tan aktu hanesan hasoru lezada ka membru família iha futuru. Entretantu, lezada konfirma faktu sira iha akuzasaun no deklara katak diak malu ona ho arguidu no to'o agora arguidu la baku ona lezada. Lezada mós deklara katak kuaze semana ida mak foin rekopera nia moras.

Alegasaun finál

Prokuradór haktuir katak arguidu konfesa faktu hotu iha akuzasaun no lezada mós konfirma faktu hirak-ne'e. Lezada ba tratamentu iha PRADET no simu ai-moruk no kuaze semada ida foin rekopera nia moras. Bazeia ba relatóriu médiku no fotografia ne'ebé junta iha prosesu ne'e, prova katak arguidu komete krime hasoru lezada. Tanba ne'e, husu ba tribunál kondena arguidu ba pena prizaun fulan sia suspende ba tinan ida fulan neen.

Entretantu defeza haktuir katak arguidu konfesa faktu hotu iha akuzasaun no arrepende ninia hahalok. Arguidu mós foin primeiravés baku lezada no to’o agora la baku ona lezida. Defeza argumenta mós katak importante sira diak malu ona hodi haree labarik sira nia futuru. Tanba ne’e husu ba tribunál aplika pena ne’ebé justu ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne’e no sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada no foin primeiravés mai hatan iha tribunál, tribunál kondena arguidu ho pena prizaun fulan neen suspende ba tinan ida.

8. Krime maus tratus ba kónjuje

Nú. Prosesu : 0012/18. BCBCV
Kompozisaun Tribunál : Koletivu
Juis : Dr. Afonso Carmona, Dr. Jose Gonçalves no Dra. Ersilia de Jesus
Prokuradór : Dr. Luis H. Rangel da Cruz
Defeza : Dr. Jose M. Guterres
Tipu pena : Pena prizaun tinan 2 fulan 6 suspende ba tinan 3

Iha 12 Marsu 2019, Tribunál Distritál Baukau prezide julgamentu leitura akordaun ba krime maus tratus ba kónjuje ne’ebé envolve arguidu CdCB hasoru nian feen, iha Distritu Baukau.

Akuzasaun Prokuradór

Prokuradór akuza katak iha 22 Janeiru 2018, tuku 21:00 kalan, arguidu fila hosi Dili no dere odamatan uma nian. Tanba rona odamatan tarutu, lezada haruka sira nian oan loke odamatan ne’e. Bainhira arguidu tama ba uma laran, arguidu hirus lezada dehan katak *“o mak hela iha ne’e halo problema hela deit”*. Lezada hatan fali ba arguidu katak *“o lakohi tau matan ba labarik sira, ha’u hela iha ne’e izmola ba ema seluk foin fó-han labarik sira”*. Depoisde rona lezada nia resposta, arguidu tuku kedas dala ida iha lezada nian kotuk-laran rezulta moras no bubu.

Tuir mai, iha 23 Janeiru 2018, dadeer, arguidu haruka lezada fila tiha ba nia inan-aman maibé lezada hatan ba arguidu katak *“Ha’u bele fila maibé tenke lia na’in sira tuur hamutuk mak ha’u fila”*.

Antes ne’e, iha Outubru 2017, iha tuku 20:00 kalan, arguidu tebe dala barak iha lezada nian kabun no loron hira tuir mai fali, arguidu basa dala ida iha lezada nian hasan-loos no rezulta moras no bubu.

Prokuradór akuza arguidu kontra artigu 154 KP kona-ba krime maus tratus ba kónjuje ho nia moldura penál tinan 2 to'o tinan 6 no konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu konfesa integralmente faktu sira iha akuzasaun no deklarata katak nia komete hahalok ne'e hasoru lezada tanba durante arguidu serbisu iha Dili, lezada sempre istori malu ho arguidu nian inan-aman sira no lori sigaru sunu sira nian oan. Mezmu nune'e, arguidu arrepende ninia hahalok, diak malu ona ho lezada no promete sei la halo tan hahalok sira hanesan ne'e iha futuru. Arguidu mós foin primeiravés mai hatan iha tribunál.

Lezada kontinua konfirma totalmente faktu sira iha akuzasaun no konfirma mós ho deklarasaun arguidu nian katak agora sira diak malu ona no to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime hasoru lezada no konsidera arguidu nia konduta ne'e priense duni elementu krime maus tratus ba kónjuje. Bazeia ba konsiderasaun ne'e, husu ba tribunál atu aplika pena prizaun tinan rua suspende ba tinan tolu.

Entretantu, defeza husu ba tribunál atu aplika pena ne'ebé adekuada ba arguidu tanba arguidu konfesa, arrepende ninia hahalok, moris dame to'o agora no foin primeiravés mai hatan iha tribunál. Aleinde ne'e, arguidu mak sustenta sira nia-nesesidade uma-laran.

Desizaun

Depoizde avalia faktu hotu, tribunál prova katak iha 22 Janeiru 2018, tuku 21:00 kalan, arguidu tuku duni dala ida iha lezada nian kotuk-laran rezulta bubu. Tribunál prova katak iha 23 Janeiru 2018, arguidu haruka lezada fila ba nia inan-aman sira no iha Outubru 2017, iha tuku 20:00 kalan, arguidu tebe dala barak iha lezada nian kabun no loron hira tuir mai arguidu basa dala ida iha lezada nian hasan loos rezulta bubu.

Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada no foin primeiravés mai hatan iha tribunál, nune'e tribunál kondena arguidu ho pena prizaun tinan rua fulan neen suspende ba tinan tolu inklui kondena arguidu selu kustu judisiál US\$ 20.00.

9. Krime maus tratus ba kónjuje

Nú. Prosesu	: 0008/18. BCVMS
Kompozisaun Tribunál	: Koletivu
Juis	: Dr. Afonso Carmona, Dr. Jose Gonçalves no Dra. Ersilia de Jesus
Prokuradór	: Dr. Luis H. Rangel da Cruz
Defeza	: Dr. Jose M. Guterres

Tipu pena : Pena prizaun tinan 2 fulan 6 suspende ba tinan 2 fulan 6

Iha 12 Marsu 2019, Tribunál Distritál Baukau prezide julgamentu leitura akordaun ba krime maus tratus ba kónjuje ne'ebé envolve arguidu SdS hasoru nian feen, iha Distritu Baukau.

Akuzasaun Prokuradór

Prokuradór akuza katak iha 04 Maiu 2018, tuku 03:00 madrugada, lezada toba hela, arguidu mai no tuda rahun tiha lezada nia telemovel. Lezada hadeer hosi kama-laran, arguidu trata aat lezada no basa dala rua iha lezada nia hasan. Hafoin tuku dala ida iha lezada nia oin.

Tuir mai iha 05 Maiu 2018, tuku 21:00 kalan, lezada ho nia kuñada diskute malu no arguidu buti lezada nia kakorok no riba lezada ba rai. Bainhira lezada monu iha rai ne'e, arguidu sama lezada. Lezada ba halo tratamentu iha Sentru Saúde Vemasse no ba hato'o keixa. Durante lezada no arguidu moris hamutuk, arguidu sempre diskonfia lezada iha relasaun amante ho mane seluk no sempre halo agresan hasoru lezada.

Prokuradór akuza arguidu kontra artigu 154 KP kona-ba maus tratus ba kónjuje ho nia moldura penál hosi tinan 2 to'o tinan 6 no konjuja ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira iha akuzasaun no deklarata katak iha 04 Maiu 2018, tempu kalan, arguidu ho roo ba buka ikan iha tasi-laran to'o tuku 03:00 madrugada. Iha momentu ne'e, arguidu telefone ba lezada maibé lezada nia telefone okupadu hela deit. Bainhira arguidu fali ba uma no husu tuir kona-ba kestaun ne'e ba lezada, mosu diskute malu. Hafoin arguidu foti lezada nia *simcard* no tau fali ba arguidu nia telemovel no la kleur mane ida telefone ba lezada nia número no bainhira arguidu simu telefone ne'e, ema ne'e taka tiha telefone no arguidu desconfia katak lezada iha amante. Arguidu deklarata katak arrepende ninia hahalok no foin primeiraves hatan iha tribunál. Mezmu nune'e, agora dadaun sira moris separa ona no lezada hola fali ona mane seluk. Arguidu no lezada iha oan na'in tolu, na'in ida hela ho arguidu no na'in rua hela ho lezada.

Entretantu, lezada konfirma totalmente faktu sira iha akuzasaun no konfirma mós ho deklarasaun arguidu nian katak agora sira la moris hamutuk ona no oan ida hela ho arguidu no oan na'in rua seluk hela ho lezada.

Alegasaun finál

Prokuradór haktuir katak arguidu konfesa faktu hotu iha akuzasaun no konfirma ho lezada nia deklarasaun katak agora dadaun sira moris separa ona tanba deit arguidu nia hahalok ne'ebé sempre halo agresan fíziku hasoru lezada. Bazeia ba produsaun ba prova sira, arguidu provadu

halo tratamentu aat hasoru lezada. Tanba ne'e, husu ba tribunál atu kondena arguidu ho pena prizaun tinan rua suspende ba tinan tolu.

Entretantu, defeza husu ba tribunál atu aplika pena ne'ebé adekua ba arguidu tanba arguidu konfesa faktu, arrepende nia hahalok, arguidu foin primeiravés mai hatan iha tribunál. Aleinde ne'e, arguidu iha hanoin atu diak malu ho lezada maibé lezada hola ona mane seluk.

Desizaun

Depoide avalia faktu hotu, tribunál prova katak iha 04 Maiu 2018 tuku 03:00 madrugada, arguidu fila hosi tasi no deskute malu ho lezada kona-ba lezada nia telefone ne'ebé sempre akupadu. Tribunál prova katak arguidu trata aat lezada, basa dala rua iha lezada nia hasan no tuku dala ida iha lezada nia oin. Tribunál mós prova katak iha 05 Maiu 2018, tuku 21:00 kalan, arguidu buti lezada nia kakorok no riba lezada ba rai no sama lezada bainhira lezada ho nia kuñada diskute malu.

Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui no kondena arguidu ho pena prizaun tinan rua fulan neen suspende ba tinan rua fulan neen no kondena arguidu ho kustu judisiál US\$40.00.

10. Krime ofensa ba integridade fízika simples ho natureza violénsia doméstika

Nú. Prosesu : 0042/18. VQWCB
Kompozisaun Tribunál : Singulár
Juis : Dra. Ersilia de Jesus
Prokuradór : Dr. Domingos Gouveia Barreto
Defeza : Dr. Antonio Fernandes
Tipu pena : Pena prizaun fulan 5 suspende ba tinan 1

Iha 14 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu GdSS hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 28 Outubru 2018, tuku 08:00 dadeer, bainhira arguidu fila mai uma, lezada husu ba arguidu "*ó la'o hela deit la hakmatek iha uma*". Hafoin, arguidu no lezada diskute malu no arguidu tolok lezada. Iha tempu hanesan arguidu haree lezada haruka sira nia oan ho idade tinan rua ba raut foer. Arguidu la konkorda no tuku dala rua iha lezada nian hasan-karuk, tuku dala ida iha hasan-loos no riba lezada ba rai.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to' o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu rekoñese ninia hahalok no deklara katak nia fila uma tarde duni. Kona-ba agresau ne'ebe nia halo hasoru lezada tanba la konkorda ho lezada ne'ebe haruka sira nian oan ho idade tinan rua kaer fali servisu. Arguidu arrepende ninia hahalok, desde forma família iha tinan 2015 arguidu deklara katak foin primeiravés baku lezada no agora la baku ona lezada. Arguidu nu'udar agrikultór iha oan na'in ida. Entretantu, lezada konfirma faktu hotu iha akuzasaun no deklara katak depoisde akontesimentu, arguidu rasik buka lezada no to' o agora la baku ona lezada. Lezada deklara katak nia ba halo tratamentu iha Sentru Saúde Watucabau.

Alegasaun finál

Prokuradór haktuir katak arguidu konfesa faktu hotu iha akuzasaun maibé haree ba volume krime violénsia doméstika agora as iha teritóriu hotu, husu atu tribunál tau prevensaun maka'as ba arguidu nia hahalok no eduka comunidade hotu atu reduz krime violénsia doméstika iha futuru. Tanba ne'e, husu ba tribunál atu kondena arguidu ho pena prizaun fulan neen suspende ba tinan ida.

Defeza haktuir katak arguidu konfesa faktu hotu iha akuzasaun, foin primeiravés halo agresau hasoru lezada, arrepende ona ninia hahalok no diak malu ona ho lezada. Tanba ne'e, husu ba tribunál aplika pena ne'ebé justu ba arguidu.

Desizaun

Depoisde avalia faktu hotu, tribunál prova katak iha 28 Outubru 2018, tuku 08:00 dadeer, arguidu no lezada diskute malu kona-ba arguidu fila tarde ba uma. Tribunál prova arguidu tuku dala rua iha lezada nian hasan-karuk, tuku dala ida iha hasan-loos no riba lezada ba rai tanba lezada haruka sira nia oan soe foer. Bazeia ba faktu provadu sira ne'e no sirkunstánsia atenuante sira tribunál kondena arguidu ho pena prizaun fulan lima suspende ba tinan ida no kondena arguidu selu kustu judisiál US\$10.00

11. Krime ofensa ba integridade fízika simples ho natureza violénsia doméstika

Nú. Prosesu	: 0033/18. VQWCB
Kompozisaun Tribunál	: Singulár
Juis	: Dra. Ersilia de Jesus
Prokuradór	: Dr. Domingos Goiveia Barreto
Defeza	: Dr. Antonio Fernandes
Tipu pena	: Pena prizaun fulan 3 suspende ba tinan 1

Iha 14 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CdCX hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 29 Agostu 2018, tuku 10:00 kalan, arguidu tuku dala tolu iha lezada nia kotuk-laran no tuku dala haat iha kanuruk. Antes akontese, lezada hakilar arguidu atu koalia netik ba arguidu nia feton ne'ebé diskute malu to'o tolok lezada tanba deit labarik, iha família barak nia oin.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu deklara katak momentu ne'ebá iha lia mate (rian mate) no ema barak iha sira nia uma. Bainhira arguidu haree lezada ho nia kuñada istori malu, arguidu sente moe no halo agresaun hasoru lezada. Maibé arguidu arrepende ona ninia hahalok no to'o agora la repete ninia hahalok. Arguidu nu'udar agrikultór deklara katak desde forma família iha tinan 2014 arguidu foin primeiravés baku lezada. Arguidu promete sei halo tan agresaun hasoru lezada iha futuro.

Entretantu, lezada kontinua konfirma faktu sira iha akuzasaun no deklara katak nia la satisfaz ho nia kuñada ne'ebé ho idade natoon, tolok fali lezada. Tanba ne'e mak lezada hakilar ba arguidu atu hanorin nia feton, maibé arguidu la hanorin nia feton, halo fali agresaun hasoru lezada. Lezada ba halo tratamentu iha Sentru Saúde Watucabau. Mesmu nune'e, lezada mós konfirma ho arguidu nia deklarasaun katak to'o agora arguidu la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun maibé haree ba volume krime violénsia doméstika aumenta maka'as iha juridisaun Baukau, husu ba tribunál atu kondena arguidu ho pena prizaun fulan neen suspende ba tinan ida. Prokurador dehan katak pena bele prevene arguidu nia hahalok no eduka comunidade hotu nune'e bele redus krime violénsia doméstika.

Enkuantu, defeza husu ba tribunál atu kondena arguidu ho pena ne'ebé adekua tanba haree ba sirkunstánsia atenuante sira hanesan arguidu konfesa, arrepende ninia hahalok, diak malu ona ona ho lezada no promete sei halo tan agresaun hasoru lezada iha futuro. Aleinde ne'e, lezada no oan sira presija arguidu nia tau-matan hanesan la'en no aman.

Desizaun

Depoisde avalia faktu hotu, tribunál prova katak iha 29 Agostu 2018, tuku 10:00 kalan, lezada ho kuñada diskute malu kona-ba labarik no arguidu tuku lezada dala tolu iha kotuk-laran no tuku dala haat iha kanuruk. Bazeia ba faktu provadu sira ne'e no sirkunstánsia atenuante sira, tribunál konklui no kondena arguidu ho pena prizaun fulan tolu suspende ba tinan ida no kondena arguidu selu kustu judisiál US\$10.00.

12. Krime ofensa ba integridade fízika simples ho natureza violénsia doméstika

Nú. Prosesu : 0092/18. LASIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Luis H. Rangel da Cruz
Defeza : Dr. Antonio Fernandes
Tipu pena : Pena prizaun fulan 6 suspende ba tinan 1

Iha 18 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdC hasoru nia feen, iha Distritu Lautem.

Akuzasaun Prokuradór

Prokuradór akuza katak iha 05 Novembru 2018, tuku 07:00 dadeer, arguidu basa dala ida iha lezada nia tilun-hun, basa dala tolu iha lezada nia kotuk-laran, arguidu foti tan ai-sanak naton ida baku dala barak iha lezada nia kotuk-laran no kona mós iha kanuruk, liman kabun no kabaas. Hafoin lezada ba hato'o keixa iha Polísia Eskuadra Lautem no kontinua ba tratamentu iha Sentru Saúde Lautem.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira iha akuzasaun no deklarata katak nia halo agresaun ne'e tanba lezada istori malu ho arguidu nia inan no lezada mós rai foos iha kuartu-laran tanba hakarak han ketak ona. Mezmu nune'e, arguidu arrepende ninia hahalok ne'e no ba bolu fali lezada iha uma mahon no perante família rua, sira diak malu no arguidu la baku ona lezada. Arguidu deklarata katak nia foin primeiravés mai hatan iha tribunál. Entretantu, lezada konfirma nafatin faktu sira iha akuzasaun no konfirma ho arguidu nia deklarasaun katak arguidu rasik mak ba bolu lezada iha uma mahon, diak malu ona ho arguidu perante família rua no to'o agora arguidu la baku ona lezada.

Alegasaun final

Prokurador haktuir katak deviaser arguidu buka alternativu seluk hodi rezolve problema entre lezada no arguidu nia inan-aman, la'os uza krime hodi rezolve problema. Arguidu konfesa ninia hahalok no la'os kestaun diak malu ona ho lezada maibe oinsa prevene arguidu la bele ona rezolve problema ho dalan krime. Tanba ne'e, husu ba tribunál atu kondena arguidu pena prizaun fulan neen suspende ba tinan ida.

Entretantu, defeza konsidera arguidu konfesa faktu hotu iha akuzasaun, arrepende ona ninia hahalok no haree mos ba razaun problema mosu lezada hakarak han ketak no tau fali foos iha kuartu laran. Lezada ninia hahalok ida-ne'e, tuir kultura timor nian katak feto foun kanten. Aleinde ne'e, bainhira lezada iha uma mahon, arguidu ho iniciativa rasik ba bolu fila lezada ba uma. Tanba ne'e, husu ba tribunál atu aplika pena ne'ebé justu hodi garante arguidu ho lezada nia moris iha futuro.

Desizaun

Depoide avalia faktu hotu, tribunál prova katak arguidu basa dala ida iha lezada nia tilun-hun, basa dala tolu iha lezada nia kotuk-laran, arguidu foti tan ai-sanak naton ida baku dala barak iha lezada nia kotuk-laran no kona mos iha kanuruk, liman kabun no kabaas. Tribunál prova mos katak bainhira lezada ba hela iha uma mahon, arguidu ba bolu fila lezada. Bazeia ba faktu provadu sira ne'e no sirkunstansia hotu, tribunál konklui no kondena arguidu ho pena prizaun fulan neen suspende ba tinan ida.

13. Krime ofensa ba integridade física simples ho natureza violência doméstica

Nú. Prosesu	: 0012/17.VQSIC
Kompozisaun Tribunál	: Singulár
Juis	: Dr. Jose Quintão
Prokurador	: Dr. Domingos Goiveia Barreto
Defeza	: Dr. Antonio Fernandes
Tipu pena	: Pena prizaun fulan 3 suspende ba tinan 1

Iha 19 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu AM hasoru nia feen, iha Distritu Vikeke.

Akuzasaun Prokurador

Prokurador akuza katak iha 19 Marsu 2017, tuku 11:00 meudia, lezada foin fila hosi natar, hirus oan sira tanba la ba ajuda lezada iha natar. Tanba la satisfas ho dezintendimentu refere arguidu kaer lezada no riba ba rai, hafoin tuku dala tolu iha kotuk laran no tebe dala ida iha kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu no deklara katak sira diak malu perante família rua. Arguidu nu'udar agrikultór no foin primeiravés mai hatan iha tribunál. Aleinde ne'e, lezada kontinua konfirma faktu hotu iha akuzasaun no deklara katak sira diak malu ona perante família, arguidu foin primeiravés baku lezada no to'o agora arguidu la repete ninia hahalok.

Alegasaun finál

Prokuradór haktuir katak arguidu nu'udar la'en, tuir loloos buka dalan atu rezolve dezentendimentu iha uma laran la'os uza violénsia hodi rezolve problema. Haree ba arguidu nia atendentu ba nia família la apropiadu, husu ba tribunál atu kondena arguidu ho pena prizaun fulan tolu suspende ba tinan ida.

Enkuantu, defeza husu ba tribunál atu kondena arguidu ho pena ne'ebé justu tanba haree ba sirkunstánsia atenuante sira hanesan arguidu konfesa, arrepente ona nia hahalok, diak malu ona ho lezada no promete sei la komete tan kualkér krime iha futuro. Aleinde ne'e, arguidu iha oan na'in lima ne'ebé presija arguidu nia tau matan.

Desizaun

Depoide avalia faktu hotu tribunál prova katak arguidu kaer lezada nia isin no riba lezada ba rai. Hafoin arguidu tuku dala tolu iha kotuk laran no tebe dala ida kotuk laran. Bazeia ba faktu provadu sira ne'e, tribunál kondena arguidu ho pena prizaun fulan tolu suspende ba tinan ida.

14. Krime ofensa ba integridade fízika simples ho natureza violénsia doméstika

Nú. Prosesu	: 0024/18.VQSIC
Kompozisaun Tribunál	: Singulár
Juis	: Dr. Jose Quintão
Prokuradór	: Dr. Domingos Goiveia Barreto
Defeza	: Dr. Antonio Fernandes
Tipu pena	: Pena prizaun fulan 2 suspende ba tinan 1

Iha 19 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LMF hasoru nia feen, iha Distritu Vikeke.

Akuzasaun prokuradór

Prokuradór akuza katak iha 26 Juñu 2018, lezada telefone ba nia aman iha Dili katak atu mai Dili. Arguidu mosu no la justifika buat ruma tuku kedas dala rua iha lezada nia matan fukun karuk no loos no tebe dala ida iha lezada nia kotuk laran. Aktu hirak ne'e rezulta lezada nia matan fukun rua no kotuk laran bubu.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa ninia hahalok no deklarata katak nia halo agresaun ne'e tanba deskonfia lezada telefone ba mane seluk. Arguidu arrepende ninia hahalok no diak malu ona ho lezada. Aleinde ne'e, arguidu deklarata katak nia profisaun hanesan badaen uma no tinan ida foin hetan US\$150.00. Arguidu foin primeiravés hatan iha tribunál. Entretantu, lezada kontinua konfirma faktu iha akuzasaun no konfirma ho arguidu nia deklarasaun katak diak malu ona ho arguidu no to'o agora arguidu la baku ona lezada.

Alegasaun finál

Prokuradór konsidera arguidu komete duni krime hasoru lezada no argumenta katak nesesidade ba prevensaun importante tanba volume krime violénsia doméstika aas. Tanba ne'e, husu ba tribunál atu kondena arguidu ho pena prizaun fulan rua suspende ba tinan ida.

Enkuantu, defeza husu ba tribunál atu kondena arguidu ho pena ne'ebé adekuaudu ho konsiderasaun sira katak arguidu arrepende ona nia hahalok no diak malu ona ho lezada. Aleinde ne'e, durante sira moris hamutuk arguidu foin primeiravés komete krime hasoru lezada.

Desizaun

Tribunál prova katak arguidu tuku dala rua iha lezada nia matan-fukun karuk no loos no tebe dala ida iha lezada nia kotuk laran rezulta bubu. Tribunál konklui no kondena arguidu ho pena prizaun fulan rua suspende ba tinan ida.

15. Krime ofensa ba integridade fízika simples ho natureza violénsia doméstika

Nú. Prosesu	: 0018/18. VQOSU
Kompozisaun Tribunál	: Singulár
Juis	: Dra. Ersilia de Jesus
Prokuradór	: Dr. Domingos G. Barreto
Defeza	: Dr. Jose M. Guterres
Tipu pena	: Pena prizaun fulan 6 suspende ba tinan 1 fulan 6

Iha 22 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu GPG hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 02 Agostu 2018, tuku 21:30, lezada kaer toman arguidu telefone nia amante no lezada husu tuir ba arguidu. Arguidu hatan ba lezada katak “o la iha direitu husu tuir”. Hafoin sira deskute malu no arguidu basa dala barak iha lezada nian hasan loos no karuk, tuku dala ida iha ibun no tuku dala tolu iha ulun kotuk no arguidu rasta lezada monu ba rai no tebe dala barak iha kotuk laran.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa ninia hahalok no deklara katak nia telefone ba nia kolega mane la'os feto. Arguidu mós deklara katak depoisde akontesimentu lezada ba hela tiha iha nia inanan aman sira no liu tiha semana ida mak arguidu ba koalia ho família no lori fila lezada. Arguidu arrepende ona nia hahalok, foin primeiravés baku lezada no la baku ona lezada. Entretantu, lezada reforsa nafatin faktu sira no deklara katak to'o agora arguidu la repete ninia hahalok. Lezada ba tratamentu iha Sentru Saúde Ossu.

Alegasaun finál

Prokuradór husu ba tribunál atu kondena arguidu ho pena prizaun fulan neen suspende ba tinan ida atu prevene arguidu la repete ninia hahalok iha futuru tanba arguidu no lezada foin moris hamutuk tinan ida.

Enkuantu defeza husu ba tribunál atu aplika pena ne'ebé justu ba arguidu tanba mezmua arguidu idade naton maibé nafatin hatene nia responsabilidade hanesan ba buka-tuir lezada hodi diak malu fali. To'o agora, arguidu la baku ona lezada no arguidu foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu no lezada deskute malu kona-ba arguidu telefone feto seluk. Tribunál prova arguidu basa dala barak iha lezada nian hasan loos no karuk, tuku dala ida iha ibun no tuku dala tolu iha ulun kotuk. Tribunál mós prova katak arguidu rasta lezada monu ba rai no tebe dala barak iha kotuk laran. Tribunál konklui no kondena arguidu ho pena prizaun fulan neen suspende ba tinan ida fulan neen inklui kondena arguidu selu kustu judisiál US\$10.00.

16. Krime ofensa ba integridade fízika simples ho natureza violénsia doméstika

Nú. Prosesu : 0009/17.MNLLA
Kompozisaun Tribunál : Singulár
Juis : Dr. Afonso Carmona
Prokuradór : Dra. Remizia de Fatima da Silva
Defeza : Dr. Jose M. Guterres
Tipu pena : Pena prizaun fulan 3 suspende ba tinan 1

Iha 22 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdC hasoru nia feen, iha Distritu Manatuto.

Akuzasaun Prokuradór

Prokuradór akuza katak iha 07 Setembru 2017, tuku 15:00 lokraik, arguidu basa dala rua iha lezada nian hasan loos, tuku tan dala ida iha kotuk laran rezulta lezada monu ba rai. Hafoin arguidu basa tan dala ida iha hasan karuk no rasta lezada ba mai iha rai.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira no deklarata katak arrepende ona nia hahalok. Arguidu mós deklarata katak diak malu fali ona ho lezada no promete katak ba futuru sei la halo tan kualkér krime hasoru membru família ka ema seluk. Arguidu foin primeiravés mai hatan iha tribunál. Nune'e mós lezada kontinua konfirma faktu sira iha akuzasaun no deklarasaun arguidu nian katak arguidu la baku ona lezada.

Alegasaun finál

Prokuradór haktuir katak arguidu konfesa faktu hotu, nune'e, husu ba tribunal atu kondena arguidu ho pena fulan tolu suspende ba tinan ida atu eduka arguidu iha futuru.

Entretantu, defeza husu ba tribunál atu kondena arguidu ho pena ne'ebé adekuada tanba arguidu konfesa faktu hotu iha akuazasaun, arrepende ona nia hahalok no diak malu ona ho lezada.

Desizaun

Tribunál prova katak arguidu basa dala rua iha lezada nian hasan loos, tuku dala ida iha kotuk laran rezulta lezada monu ba rai. Tribunál prova katak bainhira lezada monu, arguidu basa dala

ida iha hasan karuk no rasta lezada ba mai iha rai. Bazeia ba faktu provadu sira ne'e, tribunál kondena arguidu ho pena prizaun fulan tolu suspende ba tinan ida.

17. Krime ofensa ba integridade fízika simples ho natureza violénsia doméstika

Nú. Prosesu : 0021/18. VQOSU
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Domingos Goiveia Barreto
Defeza : Dr. Antonio Fernandes
Tipu pena : Pena multa US\$60.00

Iha 25 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CXA hasoru nia feen primeiru, iha Distritu Vikeke.

Akuzasaun prokuradór

Prokuradór akuza katak iha 11 Outubru 2018, tuku 10:00 dadeer, arguidu foti fatuk ki'ik ida tuda dala ida iha lezada nia ain karuk rezulta moras no bubu. Antes kazu ne'e akontese, arguidu iha uma laran rona lezada ho arguidu nia feen segundu (DdS) istori malu kona-ba sira nia karau kesi besik malu no halo karau rua ne'e tuku malu.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak sira diak malu fali perante família, arrepende ona nia hahalok no arguidu la baku ona lezada. Arguidu mós deklara katak arguidu halo uma rua ba feen na'in rua ho distansia 10 metru. Arguidu mós deklara katak foin primeiravés mai hatan iha tribunál.

Entretantu, lezada konfirma faktu hotu iha akuzasaun, no deklara katak dezde sira hola malu iha 1990, nunka iha problema maibé baihira arguidu hola tan feen segundu mosu problema. Lezada mós deklara katak arguidu la baku ona lezada.

Alegasaun finál

Prokuradór haktuir katak arguidu konfesa faktu hotu no atu prevene krime akontese tan iha futuru tanba arguidu iha feen rua no oan barak, husu ba tribunál atu kondena arguidu ho pena prizaun fulan neen suspende ba tinan ida.

Enkuantu, defeza haktuir katak mezmu arguidu iha feen na'in rua no oan nain neen maibé arguidu foin primeiravés halo agresauñ fízika simples hasoru lezada. Arguidu arrepende ona nia hahalok no diak malu ona ho lezadu. Tanba ne'e, husu ba tribunál atu aplika pena ne'ebé justu ba arguidu.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena multa US\$60.00 ne'ebé sei selu US\$0.50 kada loron durante loron 120. Tribunál mós fiksa pena alternativa durante loron 80 iha prizaun, bainhira arguidu la kumpri pena multa refere.

18. Krime ofensa ba integridade fízika simples ho natureza violénsia doméstika

Nú. Prosesu : 0077/17. PDBAU
Kompozisaun Tribunál : Singulár
Juis : Dr. Antonio Fonseca
Prokuradór : Dra. Remizia de Fatima da Silva
Defeza : Dr. Jose M. Guterres
Tipu pena : Pena prizaun fulan 3 suspende ba tinan 1 ho regra ba konduta

Iha 26 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu NC hasoru nia feen, iha Distritu Vikeke.

Akuzasaun prokuradór

Prokuradór akuza katak iha 15 Agostu 2017, tuku 08:00 kalan, lezada ba haree televizaun iha tiun nia uma, arguidu mai ho kondisaun lanu no tuku kedas dala ida iha lezada nian hasan karuk no tuku dala ida iha lezada nian matan parte loos rezulta bubu.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'ó tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira iha akuzasaun no deklarata katak kazu ne'e sira rezolve ona perante autoridade komunitáriu ho rezultadu sira moris ketak-ketak. Mezmu nune'e, arguidu kura lezada nia kanek ho osan US\$20.00 no entrega fahi ida. Arguidu arrepende ba nia hahalok no deklarata katak foin primeiravés mai hatan tribunál. Entretantu, lezada kontinua konfirma faktu sira iha akuzasaun inklui konfirma ho arguidu nia deklarasaun.

Alegasaun final

Prokuradór haktuir katak mezmu sira moris separa ona maibé atu prevene arguidu ninia hahalok ba kualkér krime hasoru ema seluk, husu ba tribunál atu kondena arguidu ho pena prizaun fulan neen suspende nia ezekusaun ba períodu tinan ida.

Aleinde ne'e, parte defeza husu ba tribunál atu kondena arguidu ho pena ne'ebé adekuaudu tanba arguidu no lezada moris separa ona, arguidu arrepende ninia hahalok no foin primeiravés mai hatan tribunál.

Desizaun

Tribunál prova katak arguidu ho kondisaun lanu, tuku dala ida iha lezada nian hasan karuk no tuku dala ida iha lezada nian matan parte loos rezulta bubu. Bazeia ba faktu provadu sira ne'e no sirkunstánsia atenuante sira, tribunál kondena arguidu ho pena prizaun fulan tolu suspende ba tinan ida. Tribunál mós aplika regra ba konduta atu arguidu apresenta-an periodikamente ba tribunál kada fulan dala ida durante fulan tolu.

19. Krime ofensa ba integridade fízika simples ho natureza violénsia doméstika

Nú. Prosesu : 0023/18. VQSIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Domingos Goiveia Barreto
Defeza : Dr. Antonio Fernandes
Tipu pena : Pena multa US\$60.00

Iha 27 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DF hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 08 Setembru 2018, tuku 08:00 dadeer, lezada haruka arguidu foti aidila hodi fó han fahi. Maibé arguidu la rona nune'e lezada tolok arguidu. Arguidu la simu no basa dala ida iha lezada nia hasan loos. Tanba lezada tolok nafatin, arguidu tuku tan dala ida iha lezada nia kabaas loos rezulta lezada monu ba rai.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu no deklara katak arguidu arrepende ninia hahalok no to'o agora la baku ona lezada. Arguidu foin primeiravés mai hatan iha tribunál no arguidu nu'udar motorista ho saláriu kada fulan US\$ 240.00. Entretantu, lezada konfirma faktu hotu iha akuzasaun no deklara katak sira forma família iha tinan 2009 iha oan na'in rua arguidu foin primeiravés baku lezada.

Alegasaun finál

Prokuradór haktuir katak krime violénsia doméstika julga loro-loron iha tribunal, tanba ne'e husu ba tribunál atu kondena arguidu ho pena prizaun fulan tolu suspende ba tinan ida. Maibé karik tribunál kondena ho pena multa, husu atu tribunál tenke haree ba arguidu nia rendimentu.

Enkuantu, defeza haktuir katak arguidu konfesa faktu hotu iha akuzasaun no arguidu hatudu nia arrependimentu tanba diak malu ona ho lezada. Nune'e mós to'o agora la baku ona lezada ho oan sira. Tanba ne'e husu ba tribunál aplika pena ne'ebé adekua ba arguidu.

Desizaun

Depoide avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$0.50 kada lora durante lora 120. Bainhira arguidu la selu pena multa ne'e, arguidu sei kumpri iha prizaun durante lora 40 nu'udar pena alternativa.

20. Krime ofensa ba integridade fízika simples ho natureza violénsia doméstika

Nú. Prosesu	: 0028/18.BCLGA
Kompozisaun Tribunál	: Singulár
Juis	: Dr. Jose Escurial
Prokuradór	: Dr. Luis H. Rangel da Cruz
Defeza	: Dr. Jose M. Guterres
Tipu pena	: Pena prizaun fulan 3 suspende ba tinan 1

Iha 27 Marsu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DS hasoru nia feen, iha Distritu Baukau.

Akuzasaun prokuradór

Prokuradór akuza katak iha 18 Setembru 2018, tuku 08:00 dadeer, arguidu fila ba uma no la koalia buat ida tuku kedas lezada dala rua iha kanuruk rezulta moras. Lezada halai no arguidu duni no toman lezada, hafoin tuku dala ida iha lezada nia kotuk laran.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Arguidu konfesa integralmente ba faktu sira iha akuzasaun no deklara katak agora dadaun sira la moris hamutuk ona tanba lezada hola fali ona mane seluk sira nia hela ho arguidu. Arguidu mós deklara katak arrepende nia hahalok no foin primeiravés mai hatan iha tribunál. Entretantu, lezada konfirma faktu sira iha akuzasaun inklui deklarasaun arguidu nian.

Alegasaun finál

Prokuradór husu ba tribunál atu kondena arguidu ho pena prizaun fulan tolu maibé suspende nia ezekusaun ba tinan ida, atu prevene arguidu la bele komete tan kualkér krime hasoru ema seluk.

Enkuantu, defeza husu ba tribunál atu kondena arguidu ho pena ne'ebé adekuaudu tanba arguidu ho lezada moris separa tiha ona, arguidu arrepende ba nian hahalok no foin primeiravés mai hatan iha tribunal. Aleinde ne'e, arguidu mak tau-matan ba sira nia oan.

Desizaun

Depoide avalia faktu hotu, tribunál prova katak arguidu tuku dala rua iha lezada nia kanuruk no bainhira lezada halai no arguidu toman, arguidu tuku tan dala ida iha lezada nia kotuk laran. Tribunál konklui no kondena arguidu ho pena prizaun fulan tolu suspende ba tinan ida.

21. Krime ofensa ba integridade fízika simples ho natureza violénsia doméstika

Nú. Prosesu : 0008/18.BCBGA
Kompozisau Tribunál : Singulár
Juis : Dr. Jose Escurial
Prokuradór : Dr. Luis H. Rangel da Cruz
Defeza : Dr. Jose M. Guterres
Tipu pena : Pena prizaun fulan 3 suspede ba tinan 1

Iha 27 Marsu 2019, Tribunál Distritál Baukau prezide julgamentu leitura sentensa ba krime ofensa integriade fízika simples ho natureza violénsia doméstika ne'ebé envolve arguidu JSR hasoru nia feen, iha Distritu Baukau.

Akuzasaun prokuradór

Prokuradór akuza katak iha 28 Agostu 2018, tuku 12:00 meudia, arguidu tama ba kioske laran no estraga tiha kabas ne'ebé uza hodi halo tais. Hafoin, arguidu dudu lezada ba parede rezulta lezada nia kabaas loos kanek. Arguidu foti ai-soru tais nian no baku dala ida iha lezada nia liman loos rezulta bubu. Arguidu tebe dala ida iha lezada nian ain tuur rezulta moras.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente no deklara katak arrepende ninia hahalok. Arguidu mós deklara katak sira diak malu fali ona no to'o agora la baku ona lezada. Entretantu, lezada kontinua konfirma faktu sira iha akuzasaun no konfirma ho saída mak arguidu deklara ba tribunál.

Alegasaun finál

Prokuradór husu ba tribunál atu kondena arguidu ho pena prizaun fulan tolu suspende ba tinan ida nune'e bele prevene arguidu pa repete ninia hahalok iha futuru.

Enkuantu, defeza husu ba tribunál atu kondena arguida ho pena ne'ebé adekuaudu ho konsiderasaun sira katak arguidu konfesa, arrepende ona nia hahalok, foin primeiravés baku lezada no diak malu ona ho lezada.

Desizaun

Depoide avalia faktu sira hotu, tribunál prova katak arguidu komete duni faktu sira iha akuzasaun prokuradór nian. Bazeia ba faktu prova hirak ne'e no tetu ho sirkunstánsia sira hotu, tribunál konklui no kondena arguidu ho pena prizaun fulan tolu suspende ba tinan ida.

22. Krime arma brankas no krime ofensa ba integridade fízika simples

Nú. Prosesu	: 0001/18. MNLCL
Kompozisaun Tribunál	: Koletivu
Juis	: Dr. Afonso Carmona, Dr. Jose Gonçalves no Dra. Ersilia de Jesus
Prokuradór	: Dr. Luis H. Rangel da Cruz
Defeza	: Dr. Antonio Fernandes
Tipu pena	: Pena prizaun tinan 2 fulan 6 suspende ba tinan 3

Iha 27 Marsu 2019, Tribunál Distritál Baukau prezide prosesu julgamentu ba krime arma brankas no ofensa ba integridade fízika simples ne'ebé envolve arguidu João Carceres hasoru Agostinho Malaka Carceres nu'udar viziñu, iha Sub-Distritu Laclo, Distritu Manatuto.

Akuzasaun Prokuradór

Prokuradór akuza katak iha 04 Janeiru 2018, maizumenus iha tuku 15:00 lokraik, arguidu lori *double stick* baku dala ida iha lezadu nian kabaas parte karuk no rezulta bubu. Arguidu lori ai-

suak tuda ba lezadu nian liman rezulta kanek. Arguidu tama ba uma laran no foti rama atu tiru lezadu maibé la konsege tanba polísia halo intervensaun.

Prokuradór akuza arguidu kontra artigu 145 KP kona-ba krime ofensa ba integridade fízika simples¹ ho nia moldura penál to'ó tinan 3 ka multa no akuza ho artigu 20 hosi Lei Nú. 5/2017 kona-ba Lei Arma Brankas.

Produsaun ba prova sira

Arguidu uza direitu nonook. Entretantu lezadu deklara katak momentu ne'ebá arguidu hemu lanu hela no arguidu haruka lezadu atu lori tiha labarik ba uma maibé lezadu rejeita no ikus mai lezadu basa uluk arguidu. Hafoin arguidu lori *double stick* baku lezadu, ai-suak tuda lezadu, no foti rama maibé arguidu la konsege dada rama refere tanba haree ema barak iha fatin akontesimentu. Arguidu deklara mós katak depoisde akontese sira buka malu diak malu fali perante autoridade komunitáriu.

Alegasaun finál

Prokuradór husu ba tribunál atu kondena arguidu ho pena prizaun tinan tolu hodi prevene arguidu la repete ninia hahalok. Entretantu, defeza husu pena ne'ebé mak justu ba arguidu tanba rama refere la'os arguidu nian maibé lezadu nian no iha momentu ne'e arguidu la see rama refere ba iha lezadu.

Desizaun

Depoisde avalia faktu hotu, tribunál prova katak arguidu foti no kaer duni rama ambon atu tiru lezadu maibé la konsege tanba haree ema barak iha fatin akontesimentu. Bazeia ba faktu provadu sira ne'e no sirkunstánsia atenuante sira hanesan, diak malu ona ho lezadu no foin primeiravés mai hatan iha tribunál, nune'e tribunál kondena arguidu ho pena prizaun tinan rua fulan neen suspende ba tinan tolu.

23. Krime ofensa ba integridade fízika simples ho natureza violénsia doméstika

Nú. Prosesu	: 0171/18.BCBCV
Kompozisaun Tribunál	: Singulár
Juis	: Dr. Jose Quintão
Prokuradór	: Dr. Gustavo A. M. da Silva
Defeza	: Dr. Antonio Fernandes
Tipu pena	: Pena prizsun fulan 6 no suspende ba tinan 1

¹Krime ofensa ba integridade fizika simples ho natureza semi publiku nune'e antes ba julgamentu tribunál halo tentativa konsiliaun ba parte-sira. Tanba ne'e iha prosesu tentativa konsiliaun ne'e lezadu deziste keixa hasoru arguidu nune'e tribunál omologa akordu parte sira no tribunál kontinua julgamentu ba krime arma brankas.

Iha 28 Marsu 2019, Tribunál Distritál Baukau prezide julgamentu ba leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DF hasoru nian feen, iha Distritu Baukau.

Akuzasaun Prokuradór

Prokuradór akuza katak iha 06 Dezembru 2018, tuku 08:00 dadeer, arguidu lori kadeira baku lezada nian hirus-matan no rezulta bubu. Arguidu foti enxada baku lezada maibé la konsege tanba lezada hakuak tiha arguidu nia isin lolon.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu hotu no deklara katak arrepende ba nia hahalok. Arguidu diak malu fali ona ho lezada no promete sei la repete iha futuru. Entretantu, lezada kontinua konfirma faktu hotu iha akuzasaun no deklara katak akontese to'o agora arguidu la baku ona lezada.

Alegasaun finál

Prokuradór husu ba tribunál atu kondena arguidu tuir konviksaun tribunál nian, tanba mezmu tribunál kondena ona arguidu barak relasiona ho krime violénsia doméstika maibé volume krime ne'e kontinua aumenta.

Aleinde ne'e, defeza husu ba tribunál atu aplika pena ne'ebé adekuaudu ba arguidu tanba arguidu konfesa faktu hotu iha akuazasaun, arrepende ona nia hahalok, diak malu ona ho lezada no foin primeiravés mai hatan iha tribunál.

Desizaun

Depoisde avalia prova sira hotu, tribunál prova katak arguidu komete duni krime hasoru lezada tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira, tribunál kondena arguidu ho pena prizaun fulan neen suspende ba tinan ida.

Ba informasaun liután bele kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl

Website: <http://jsmp.tl/>